

non sincere, 86 di do savii di Terra ferma, 93 di no et fu preso di no; et lo avi l'honor.

Fo leto la suplication di sier Zuan Michiel qu. sier Donado debitor di la Signoria nostra, qual dimanda la suspension per do anni di soi debiti, ofendosi il primo officio over rezimento dar la mitade etc., unde fu posto per i Consieri, Cai di XL e Savii, conciederli quanto el dimanda. Balotà do volte, non fu presa. Ave una non sincere, 52 di no, 121 di sì; *iterum* ave nulla non sincere, 52 di no, 127 di sì, nulla fu preso, vol i quatro quinti.

Fu posto, per li Consieri, Cai di XL, sier Domenego Trivixan el cavalier procurator, sier Alvise da Molin procurator Provedadori sora il Monte nuovo, Savii dil Consejo e Terra ferma, atento è uno che non vol esser nominato si oferise a dar ducati 2000 d'intrada a la Signoria senza danno particular ni publico, ma la Signoria spendi, che non sarà, l'intrada di uno anno, e vol il sexto di dita intrada potendola afitar daspersi, vender etc. Però messeno che li sia concesso, *ut supra*; la qual intrada sia a disfattation dil Monte novo. Fu presa: 149 di sì, 30 di no.

Nota. Intesi è sier Nicolò di Prioli qu. sier Domenego da san Felixe, el qual el di drio fo in Colegio, fo a . . . . Val Polesela in Veronese.

26<sup>a</sup> Fu posto, per tutti cinque Savi ai ordeni le galie do al viazo di Barbaria, *videlicet* quelle è ritornate de dito viazo, con don ducati 3000 per galia: *videlicet* ducati 1000, debitori Provedadori sora i Officii, exceptuando di Sali; ducati 500, Provedadori e Avogadori extraordenari fati fin 1518, et ducati 500 Provedadori sora i conti, et ducati 1000 di debitori de le Cazude fati e si farano, potendosi prevaler di ubligar i doni, dando fidejussion in Colegio etc., si provino per tutto 25 dil presente, partino al primo de Mazo, soto pena di perder el deposito harano fato. Et a di 10 parti el Capitano et a di 15 la conserva, soto pena al Capitano di perder la tessera, debbi dar a l'Arsenal ducati 60 per galia. Vadi di Puola a Saragosa, poi al loco Maxerata, poi Tunis, se li par tochi el Zanachi, poi Armeria, Carthagenia, Valenza, Tortosa, torni a Tunis poi a Saragosa et aditura in questa terra, et li mercadanti manderano, pagi *solum* l'una e meza per 100 di angaria. *Item*, li Patroni debano mandar a soe spexe e tuor el salvo conduto e suspension di merce dil Catholico re. *Item*, observi el Capitano le batalation etc. di Tunis. *Item*, non porti alcuni, su le galie, azali, soto gran pene, et non menando li nobeli, pagino ducati 4 per 100 e sia comesso a li Provedadori

sora i conti. *Item*, el Capitano non stagi più dil tempo limitado soto gran pene *ut in parte*, et cussi se observi in tutti li incanti altri; et li scrivani siano ubligà notar i tempi dil zonzer, e quello cargerano, da poi è tornati de qui apresenti i libri a li ditti Provedadori sora i conti etc. *ut in eo*: 153 de sì, 10 de no.

Fu posto, per li Consieri, Cai di XL e Savi tutti di Colegio, atento che per bisogno de la città di Cataro fusse tolto uno navilio con formenti a Antonio Pernizich da Liesna et compagni, *videlicet* una cavavela, et dil 1506, 15 Avosto, fu preso sia pagato li a Cataro di tanti sali per lire 4245, di qual non ha auto se non ducati 100, però sia preso li sia dato sali di Pago per ditto amontar in anni 3 ogni anno la rata, potendo quelli vender in lochi non proibiti *ut in parte*. Fu presa 160, 3.

Fu posto, per li ditti *ut supra*, atento domino Mexa Gerbessi capo di stratioti sempre habi ben servito la Signoria nostra, e *ultimate* a Traù al presente come è noto a questo Consejo, unde, per farli bon animo, la provision l'ha di ducati 10 per paga a page 8 l'anno servendo *actualiter*, poi la so morte sia data a Gini Gerbessi suo fiol, qual ha anni 22, et serve la Signoria col padre etc. *ut in parte*, fu presa: 165, 4.

Fu leto la suplication di Carlo di Cedolines di Zara, domanda, l'acordo fato con li frati di San Francesco confirmà per il Papa sia *etiam* confirmà per questo Consejo; et li Consieri messeno la parte fusse confirmà, con questo non prejudichi a li poster in caso si trovasse il *fide comisso*. Et fu presa, 103, 18, 8.

Fu stridà el primo Consejo di Pregadi si farà li 27 Savii ai ordeni; però chi se voleno far tuor, si dagine in nota in Canzelaria justa la forma di la leze.

Fu fato el scurtinio di do Provedadori sora l'armar, qual fo tolto in scrittura, et questo qui sotto sarà scritto.

*Electi do Provedadori sora l'armar,  
justa la forma di la parte.*

|   |        |
|---|--------|
| Sier Marco Orio, fo duca in Candia,<br>qu. sier Piero . . . . .                 | 56.126 |
| Sier Nicolò Pasqualigo, fo di la Zonta,<br>qu. sier Vetur . . . . .             | 24.144 |
| — Sier Luca Trun, è savio dil Consejo,<br>qu. sier Antonio . . . . .            | 87. 79 |
| Sier Polo Capelo el cavalier, fo savio<br>dil Consejo, qu. sier Vetur . . . . . | 79. 88 |